

宋
史
新
編

宋史新編卷六

本紀六

明南京戶部主事莆田柯維騏著

哲宗

哲宗憲元繼道世德揚功欽文睿武齊望昭孝皇帝諱煦神宗第六子也母德妃朱氏是爲欽成皇后熙寧九年十二月七日生帝于宮中初名傭授檢校太尉天平軍節度使封均國公元豐五年進開府儀同三司彰武軍節度使封延安郡王八年春二月神宗寢疾宰相王珪等請早建儲又請皇太后權同聽政神宗首肯三月甲午朔皇太后垂簾福寧殿諭珪等曰皇子自皇帝服

藥手寫佛書爲帝祈福因出以示珪等字極端謹珪等稱賀遂奉制立爲皇太子戊戌神宗崩帝卽位己亥大赦天下羣臣進秩諸軍賜賚有差庚子尊皇太后曰太皇太后皇后曰皇太后德妃朱氏曰皇太妃甲寅同太皇太后聽政庚申宰臣王珪已下悉進秩封叔顥爲揚王顥爲荆王弟信必侯似及宗室進封有差辛酉詔顏子孟子配享孔子廟庭夏四月甲戌詔曰先皇帝臨御十有九年建立政事以澤天下而有司奉行失當幾於煩擾或苟且文具不能宣布實惠其申諭中外協心奉命以稱先帝惠安元元之意乙亥詔以太皇太后生日

七月十六日爲坤成節五月丁酉避僖祖忌辰以帝生
日次日爲興龍節庚戌左僕射王珪卒戊午以蔡確爲
尚書左僕射兼門下侍郎韓縝右僕射兼中書侍郎章
惇知樞密院事司馬光爲門下侍郎六月庚午賜孝子
徐積粟帛丁亥詔中外臣庶直言朝政闕失民間疾苦
秋七月戊戌以呂公著爲尚書左丞詔府界三路保甲
罷團教丙辰罷沅州增修堡砦冬十月丁丑詔侍從各
舉諫官一人罷義倉乙酉葬神宗于永裕陵丙戌罷方
田十二月壬戌開經筵甲戌罷後苑西作院戊寅罷增
置鑄錢監是歲夏國高麗于闐大食來貢遼遣使來弔

祭及賀卽位其賀生辰正旦自是歲交遣使如故事
元祐元年春正月戊午甘露降迄元符甘露降凡二十
二月丁卯詔侍從各舉堪任監司者二人閏月庚寅蔡
確能知陳州以司馬光爲尚書左僕射兼門下侍郎詔
韓維孫永呂大防范純仁詳定役法壬辰以呂公著爲
門下侍郎丙午以李清臣爲尚書左丞呂大防爲尚書
右丞辛亥章惇罷知汝州甲寅詔侍從各舉經明行修
可爲學官者二人乙卯以范純仁同知樞密院事丙辰
罷諸州常平管勾官三月辛未置訴理所許熙寧以來
得罪者自言乙亥罷配河蘭會路經制財用司辛巳以

程頤爲崇政殿說書夏四月己丑韓縝罷知潁昌府辛卯詔河北諸路旱災蠲其租辛丑詔大臣各舉可充館閣者三人壬寅以呂公著爲尚書右僕射兼中書侍郎詔起致仕太師文彥博平章軍國重事乙巳詔戶部裁冗費內侍李憲王中正宋用臣石得一有罪貶五月丁巳朔以韓維爲門下侍郎壬戌詔侍從臺官監司各舉縣令一人戊辰命程頤同修國子監條制壬午詔太師文彥博班宰相之上六月甲辰置春秋博士貶呂惠卿建州安置甲寅詔正風俗脩紀綱勿理隱疵細故秋七月辛酉設十科舉士法乙丑夏主秉常卒子乾順立入

月辛卯罷青苗法九月丙辰朔左僕射司馬光卒辛酉
大饗明堂以神宗配赦天下丁卯以蘇軾爲翰林學士
知制誥己卯張璪罷知鄭州冬十一月戊午以呂大防
爲中書侍郎劉摯爲尚書右丞是歲占城于闐來貢

二年春正月乙丑封乾順爲夏國主戊辰詔舉人程試
主司毋得於老莊列子書命題二月丁亥詔施黔戎瀘
等州保甲監司免歲閏三月戊辰詔御史臺察民俗奢
僭者夏四月丁亥鬼章子結吼齦寇洮東己丑詔太師
文彥博十日一議事都堂辛卯詔冬夏旱暵海內被災
者廣避殿減膳責躬思過以圖消弭癸卯雨乙丑以布

衣陳師道爲亳州司戶參軍丁未復制科戊申李清臣
罷知河陽五月癸丑夏人圍南川砦丁卯以劉摯爲尚
書左丞王存爲尚書右丞六月辛丑以安燾知樞密院
事秋七月庚戌朔日有食之陰雨不見辛亥夏人寇鎮
戎軍庚申進封李乾德爲南平王辛未韓維罷知鄆州
八月辛巳程頤罷經筵丁未岷州將种誼復洮州執鬼
章青宜結冬十二月壬寅頒元祐敕令式是冬始閉汴
口是歲交阯子闢西南諸蕃來貢

三年春正月庚戌復廣惠倉庚申雪寒發京西穀五十
餘萬石損其直以紓民壬戌罷上元遊幸三月乙亥夏

人寇德靜岩夏四月辛巳以呂公著爲司空同平章軍國事呂大防爲尚書左僕射兼門下侍郎范純仁爲尚書右僕射兼中書侍郎壬午以孫固爲門下侍郎劉摯爲中書侍郎王存爲尚書左丞胡宗愈爲尚書右丞趙瞻簽書樞密院事秋七月戊申荆王頤卒冬十月丙戌詔罷新創諸堡砦廢渠陽軍閏十二月甲辰范鎮定鑄律度諸樂器以進令禮官太常參定賜鎮詔曰朕惟春秋之後禮樂先亡秦漢以來韶武僅在散樂工於河海之上往而不還聘先生於齊魯之間有莫能致魏晉以下曹檜無譏豈徒鄭衛之音已雜華戎之器間有作者

猶存典刑然銖黍之一差或宮商之易位惟我四朝之老獨知五降之非審聲知音以律生尺覽詩書之來上閱龜虞之在廷君臣同觀父老太息方詔學士大夫論其法工師有司考其聲上追先帝移風易俗之心下慰老臣愛君憂國之志究觀所作嘉歎不忘是歲大食麻糬拔于闐三佛齊西南蕃阿里骨來貢

四年春二月甲辰司空呂公著卒三月己卯作渾天儀胡宗愈罷知陳州夏四月戊午立試進士四場法罷明法科五月蔡確連貶新州安置六月甲辰范純仁罷知潁昌府王存罷知蔡州丙午以趙瞻同知樞密院事韓

忠彥爲尚書左丞許將爲尚書右丞秋七月乙亥知樞密院安壽母喪去位八月壬寅敕郡守貳以四善三最課縣令吏部歲上監司考察知州狀九月辛巳大饗明堂赦天下冬十一月癸未以孫固知樞密院事劉摯爲門下侍郎傅堯俞爲中書侍郎十二月癸丑更定朝儀樂舞戊午以御史闕令中丞兩省各舉二人是歲夏人復通好詔邊將母生事邈黎大食麻囉拔來貢

五年春二月己亥夏人來歸永樂所掠吏士百四十九人詔以四砦界之庚戌太師文彥博致仕三月丙寅朔知樞密院趙瞻卒壬申以韓忠彥同知樞密院事蘇頌

爲尚書左丞夏四月內午知樞密院孫固卒秋七月乙酉夏人來議分畫疆界冬十月癸巳罷提舉修河司十二月辛卯朔許將罷知定州是歲京東旱浙西水高麗于闐三佛齊龍蕃阿里骨來貢

六年春二月辛卯以劉摯爲尚書右僕射兼中書侍郎王巖叟簽書樞密院事癸巳以蘇轍爲尚書右丞夏四月辛丑夏人寇熙河蘭岷鄜延路五月己未朔日有食之秋八月己丑三省進納后六禮儀制九月丁亥夏人寇麟府一州丁酉出內庫緡錢五十萬備邊費冬十月庚午幸國子監賜祭酒豐稷三品服監學官賜帛有差

十一月乙酉劉摯罷知鄆州辛丑中書侍郎傅堯俞卒
是歲作觀天曆兩浙水交陞高麗三佛齊拂箖來貢
七年夏四月己未立孟氏爲皇后五月丙午王巖叟罷
知鄭州六月辛酉以蘇頌爲尚書右僕射兼中書侍郎
韓忠彥知樞密院事蘇轍爲門下侍郎范百祿爲中書
侍郎梁燾爲尚書左丞鄭雍爲尚書右丞劉奉世簽書
樞密院事戊辰渾天儀像成秋七月庚戌宗室總麻以
上禁祈居冬十月庚戌朔環州地震丁卯夏人寇環州
十一月癸巳合祭天地于圜丘赦天下是歲于闐高麗
占城西南蕃龍氏羅氏來貢

八年春三月甲申蘇頌罷爲集禧觀使辛卯范百祿罷
知河中府庚子詔御試舉人復試詩賦論三題夏四月
丁未朔夏人來謝罪請以蘭州易寒門砦不許丁巳詔
曰朕聞五帝不相沿樂三王不相襲禮世有損益因時
制宜惟我祖宗嚴奉郊廟當遣官攝事皆考合於前文
唯奠玉親祠自裁成於大禮每以三歲對越二儀咸秩
百神大賚四海迄先帝元豐之末講方丘特祭之儀蓋
將補一代之闕容振古主之墜典朕惟菲德嗣守不基
列聖已行謹當遵奉先朝未舉懼不克堪是以昔歲仲
冬竭誠大祀神祇饗答祖考燕寧前詔有司載加集議

猶欲各度諸儒之論稽參六藝之文然理既不疑則事無可議斷自朕志協于僉言祇率舊章永爲成式今後南郊合祭天地依元祐七年例施行仍罷禮部集官詳議六月戊午梁燾罷爲醴泉觀使秋七月丙子朔以范純仁爲右僕射兼中書侍郎九月戊寅太皇太后高氏崩冬十月庚午復內侍劉瑗等六人十一月乙未以雪寒振京城民饑十二月丁寅倣唐六典脩官制是冬以禮部侍郎楊畏言復章惇呂惠卿官是歲京東西河南北淮南水民流振之

紹聖元年春二月丁未以李清臣爲中書侍郎鄧潤甫

爲尚書左丞已酉葬宣仁聖烈高皇后于永厚陵三月
壬申朔日有食之乙亥呂大防罷知潁昌府丁酉蘇轍
罷知汝州夏四月壬子知定州蘇軾坐前掌制命語涉
譏訕貶知英州癸丑改元白虹貫日甲寅追復蔡確官
壬戌以章惇爲尚書左僕射兼門下侍郎范純仁罷知
潁昌府丁卯詔復元豐免役法戊辰同修國史蔡卞請
重修神宗實錄閏月壬申復提舉常平官癸酉罷十科
舉士法甲申以安燾爲門下侍郎丙戌復義倉五月甲
辰罷進士習試詩賦令專二經置宏詞科辛亥劉奉世
罷知成德軍癸丑編類元祐羣臣章疏及更改事條乙

丑尚書左丞鄧潤甫卒六月甲戌侍御史來之邵等疏
蘇軾^轉斥先朝罪再謫惠州癸未以曾布同知樞密院
事甲申除進士引用王安石字說之禁秋七月丁巳以
御史黃履周秩諫官張商英言追奪前宰執司馬光呂
公著王巖叟贈謚貶前宰執呂大防爲祕書監劉摯爲
光祿卿蘇轍爲少府監竝分司南京梁燾予外祠戊午
詔大臣朋黨司馬光以下各輕重議罰布告天下九月
庚戌罷制科罷廣惠倉冬十二月甲午范祖禹趙彥若
黃庭堅坐神宗實錄失當貶永豐縣安置是歲京師
疫洛水溢太原地震河北水振之夏國三佛齊西南蕃

阿里骨來貢

二年春二月乙亥呂大防坐史事貶安州居住辛巳出內庫錢帛二十萬助河北振饑夏四月壬申詔吏部尚書許將等各舉才行可備任使者二人丁亥詔依元豐置律學博士秋七月丙辰詔大理寺復置右治獄仍依元豐增官屬九月辛亥大饗明堂赦天下冬十月甲子鄭雍罷知陳州甲戌以許將爲尚書左丞蔡卞爲尚書右丞辛巳進封顥爲楚王十一月乙未安燾罷知河南府是歲父吐三佛齊阿里骨來貢

三年春正月庚子韓忠彥罷知真定府二月辛未復元

豐恤孤幼令三月壬辰以禁中屢火罷春宴及幸池苑
丁酉尚書省火辛亥進封佖爲申王佶爲端王秋八月
庚辰以范祖禹劉安世在元祐中構造誣謗責授祖禹
昭州別駕賀州安置安世新州別駕英州安置九月壬
子楚王顥卒乙卯廢皇后孟氏冬十二月甲戌翰林學
士蔡京上新修太學敕令式是歲夏人屢入寇于閩大
食龜茲西南蕃龍氏羅氏來貢

四年春正月庚戌李清臣罷知河南府二月己未以三
省言追貶呂公著爲建武軍節度副使司馬光清遠軍
節度副使王巖叟雷州別駕奪趙瞻傅堯俞贈謚追韓

維到任及孫固范百祿胡宗愈遺表恩已卯復元豐權
茶法庚辰罷春秋科癸未以三省言貶劉奉世及韓維
以下三十人官再貶呂大防爲舒州團練使劉摯鼎州
團練副使蘇轍化州別駕梁灝雷州別駕范純仁武安
軍節度副使安置于循新雷化永五州大防摯灝竟卒
賊所甲申降文彥博爲太子少保閏月壬寅以曾布知
樞密院事許將爲中書侍郎蔡卞爲尚書左丞黃履爲
尚書右丞林希同知樞密院事甲辰再貶蘇軾移昌化
軍安置范祖禹移賓州安置劉安世移高州安置三月
壬戌夏人犯麟州庚午夏人大至葭蘆城丁知石州張

構等擊走之壬午命官編類司馬光等改廢法度論奏
事狀夏四月甲辰知渭州章楨城平夏丁未追貶王珪
爲萬安司戶參軍五月丁丑貶韓維爲崇信軍節度副
使六月癸未朔日有食之秋八月己酉彗出西方九月
壬子詔求直言乙卯赦天下冬十一月癸酉貶劉奉世
柳州安置丁丑詔放歸田里程頤涪州編管是歲于閩
西南羅蕃來貢播州夷楊光榮等內附內浙饑振之
元符元年春正月丙寅得秦望于咸陽三月甲戌進封
侯爲莘王似爲簡王偃爲永寧郡王夏四月壬辰林希
罷知亳州六月戊寅朔改元秋七月庚午再貶范祖禹

移化州安置劉安世梅州安置祖禹尋卒詔王巖叟朱
光庭諸子並勒停不敘是時文彥博子及甫亦陷于獄
因銅劉摯染燾子孫于嶺南八月丁亥詔大臣各舉所
知仍指言所堪職任九月庚戌前國史院編修秦觀再
貶雷州編管冬十月己亥夏人寇平夏城十一月甲子
祀昊天上帝于圜丘罷合祭赦天下是歲西蕃首領李
訛移等內附高麗瞎征西南諸蕃來貢澶州河溢振恤
河北京東被水者

二年春二月甲申夏人遣使謝罪却不納三月丙辰遼
遣使爲夏人請緩師夏四月癸巳進封偲爲睦王五月

癸亥建西安州及天都等砦是月河決內黃口東流斷絕秋七月丙寅洮西安撫使王瞻復邈川城西蕃首領以城降八月癸酉宰臣章惇等進新修敕令式惇讀於帝前其間有元豐所無而用元祐者帝曰元祐亦有可取乎惇等對曰取其善者甲戌詔大河水勢北流其以河事付轉運司責州縣併力敕護隄岸語在河渠志癸未歲星晝見丁亥修復會州癸巳暗征降九月庚子夏人遣使謝罪請和丁未立賢妃劉氏爲皇后己未青唐酋隴拶以城降甲子右正言鄒浩論劉氏貶新州羈管閏月癸酉以青唐爲鄯州隴右節度邈川爲湟州宗哥

城爲龍支城俱隸隣右戊寅以廓州爲寧砦城辛巳責
履罷知亳州冬十一月乙未詔諸州學行三舍法是年
蔡卞章惇議置看詳訴理局由是士大夫重得罪者入
百餘家

二年春正月辛未帝有疾不視朝己卯帝崩在位十六
年年二十五帝無子皇太后乃立徽宗七月徽宗上尊
諡曰欽文睿武昭孝皇帝廟號哲宗崇寧三年加諡曰
憲元繼道顯德定功欽文睿武齊聖昭孝政和二年改
今諡

論曰哲宗幼冲踐祚政出宣仁倚任元老彙征衆賢悉

卷六
宋史新編
廢王安石所興爲以復祖宗之舊當是時海內元元歡若更生遼人亦以生事爲戒封徵罷警蓋庶幾慶曆嘉祐之隆矣及帝親政乃惑於熙豐茲黨假紹述以報復由是仁賢受禍國事日非馴致靖康之難夫審於忠邪則哲察於理亂則哲帝烏足以語此

宋史新編卷七

本紀七

明南京戶部主事莆田柯維騏著

徽宗

徽宗體神合道駿烈遜功聖文仁德憲慈顯孝皇帝諱佶神宗第十一子也母貴儀陳氏是爲欽慈皇后元豐五年十月十日生帝于宮中明年授鎮寧軍節度使封寧國公哲宗立封遂寧郡王紹聖三年封端王出就傅五年加司空改昭德彰信軍節度元符三年正月己卯哲宗崩皇太后垂簾哭謂宰臣曰大行皇帝無子天下事須早定章惇厲聲對曰在禮律當立母弟簡王皇太

后曰申王長有目疾於次端王當立惇曰簡王乃同母之弟且端王輕佻不可以君天下皇太后不以爲然知樞密院曾布叱惇宜如皇太后聖諭尚書左丞蔡卞中書門下侍郎許將皆曰合依皇太后聖諭皇太后又曰先帝嘗言端王有福壽且仁孝不同諸王於是惇默然乃召端王入卽位皇太后權同處分軍國事庚辰赦天下百官進秩一等辛巳尊先帝后劉氏爲元符皇后癸未追尊母陳氏爲皇太妃丙戌兄佖進封陳王戊子宰相章惇加封爵己丑弟僕似偲進封有差二月己亥始聽政丁未立王氏爲皇后庚申以韓忠彥爲門下侍郎

黃履爲尚書左丞辛酉名懿親宅潛邸曰龍德宮三月
戊辰詔近臣各舉可任臺諫者甲申以王瞻棄青唐遂
弃棄邈川乃以西蕃王隴拶爲河西軍節度使賜姓名
曰趙懷德邈川首領瞎征爲懷遠軍節度使夏四月丁
酉朔日有食之甲辰以韓忠彥爲尚書右僕射兼中書
侍郎李清臣爲門下侍郎蔣之奇同知樞密院事丁未
以生日爲天寧節是月范純仁等復宮觀蘇軾等徙內
郡召陳瓘鄒浩爲正言五月丙子詔復廢后孟氏爲元
祐皇后乙酉蔡卞罷知江寧府己丑詔追復前宰執文
彥博王珪司馬光呂公著呂大防劉摯等三十三人官

秋七月丙寅朔皇太后詔罷同聽政辛卯封子亶爲韓國公八月壬寅葬哲宗于永泰陵九月辛未章惇罷知越州冬十月丙申出蔡京知永興軍貶章惇武昌軍節度副使丁酉以韓忠彥爲尚書左僕射兼門下侍郎壬寅以曾布爲右僕射兼中書侍郎已未詔禁曲學偏見妄意改作以害國事者辛酉罷平準務十一月戊寅以安燾知樞密院事庚辰黃履罷爲中太乙宮使己丑置春秋博士辛卯以范純禮爲尚書左丞是歲夏國高麗來貢遼遣使來弔祭及賀卽位其賀生辰正日自是歲交遣使如故事

建中靖國元年春正月壬戌朔有赤氣亘天間白黑甲
戌皇太后向氏崩遺詔追尊皇太妃陳氏爲皇太后遼
主洪基卒孫延禧立二月丁巳貶章惇爲審州司戶參
軍三月丁丑詔以趙懷德知湟州夏四月辛卯朔日食
不見五月丙寅葬欽聖憲肅向皇后欽慈陳皇后于永
裕陵六月庚寅朔子寔進封京兆郡王戊午范純禮罷
知潁昌府秋七月丙戌安壽罷知河南府丁亥以蔣之
奇知樞密院事陸佃爲尚書右丞章楨同知樞密院事
冬十月乙未李清臣罷知大名府十一月庚申以陸佃
爲尚書左丞溫益爲尚書右丞庚辰合祀天地于圜丘

赦天下詔改明年元是歲河東地震京畿蝗江淮兩浙

湖南福建旱

崇寧元年春正月丁丑太原等十一郡地震詔振死者
家二月甲午子亶改名烜辛丑皇太妃朱氏薨追尊爲
皇太后庚戌追封孔鯉爲泗水侯孔伋爲沂水侯夏五
月庚申韓忠彥罷知大名府庚午前宰執司馬光文彥
博等四十四人奪官有差乙亥黜後苑內侍請以箔金
飾宮殿者戊寅葬欽成朱皇后于永裕陵己卯陞佃罷
知亳州庚辰以許將爲門下侍郎溫益爲中書侍郎蔡
京爲尚書左丞趙挺之爲尚書右丞六月癸丑追封伯

夷爲清惠侯叔齊爲仁惠侯閏月壬戌曾布罷知潤州
甲子詔諸路州縣官有治績最著者監司帥臣各舉一
人癸未詔諸路小使臣以上及親民官內有知謀勇果
可任將帥者監司帥臣各舉一人秋七月丙戌詔省臺
寺監及監司郡守竝以三年成任戊子以蔡京爲尚書
右僕射兼中書侍郎己丑焚元祐法甲午詔都省置講
議司以蔡京提舉庚子章粢罷爲中太乙宮使甲辰以
京畿大雨水壞民居詔振恤壓溺者辛亥罷春秋博士
八月乙卯子烜改名桓煥改名楷辛未詔郡縣置安濟
坊養民之貧病者甲戌詔天下興學貢士建外學于國

南丙子詔司馬光等二十一人子弟母得官京師己卯
以趙挺之爲尚書左丞張商英爲尚書右丞九月戊子
置居養院以處鰥寡孤獨者乙未詔籍元符三年上書
臣僚爲正邪各三等因旌擢鍾世美等四十一人降責
范柔中等五百餘人丁酉治臣僚議復元祐皇后及謀
廢元符皇后者罪降宰臣韓忠彥曾布官追貶李清臣
爲雷州司戶參軍黃履爲祁州團練副使竄翰林學士
曾肇御史中丞豐稷諫臣陳瓘龔夬等十七人于遠州
己亥籍元祐及元符末宰相文彥博等侍從蘇軾等餘
官秦觀等內臣張士良等武臣王獻可等凡百二十八人

御書刻石端禮門冬十月癸亥蔣之奇罷知揚州甲戌
以御史錢適石豫左虜及輔臣蔡京許將溫益趙挺之
張商英等言罷元祐皇后之號復居瑤華宮丙子劉奉
世等二十七人坐元符末黨與變法並罷祠祿戊寅以
蔡下知樞密院事十一月癸巳置西南兩京宗正司及
敦宗院分處宗室非袒免親者戊申子楷封高密郡王
十二月癸丑諭棄湟州罪前宰執韓忠彥曾布安燾范
純禮貶官有差丁丑詔邪說詖行及元祐學術政事並
勿施用是歲京畿京東河北淮南蝗江浙福建熙河潭
衡郴州旱

二年春正月乙酉任伯雨陳瓘龔夬鄒浩竝竄嶺南馬
涓等九人分貶諸州是月知荆南舒亶平辰流州猺賊
復誠徽州詔進宣官壬辰中書侍郎溫益卒丁未以蔡
京爲尚書左僕射兼門下侍郎二月甲寅進元符皇后
爲太后夏四月丁卯詔毀呂公著司馬光呂大防范純
仁劉摯范百祿梁燾王巖叟景靈宮繪像乙亥詔毀刊
行范祖禹唐鑑并三蘇秦觀黃庭堅等文集戊寅以趙
挺之爲中書侍郎張商英爲尚書左丞吳居厚爲尚書
右丞安惇同知樞密院事奪王珪贈謚追毀程頤出身
文字其所著書令監司覺察六月內侍童貫及安撫王

厚復湟州秋七月辛巳以復湟州進蔡京蔡卞官乙巳
詔責降人子弟母得任在京及府界差遣八月丁未朔
再論棄湟州罪韓忠彥等再貶官有差戊申張商英罷
知亳州九月癸巳令天下州郡各建崇寧寺辛丑令天
下監司長吏廳各立元祐姦黨碑是歲置諸路茶場更
鹽鈔法于闐來貢

三年春正月戊子鑄當十大錢甲辰鑄九鼎二月庚申
令天下坑冶金銀復輸內藏三月辛巳置文繡院辛丑
太內災夏四月乙卯復鄆州辛酉復廓州是月封子楫
樂安郡王未幾卒五月論復鄆廓功進蔡京司空封嘉

國公許將趙挺之吳居厚安惇蔡卞各轉三官六月壬寅朔圖熙寧元豐功臣於顯謨閣癸酉詔以王安石配享孔子廟壬子置書畫筭學戊午詔重定元祐元符姦黨及上書邪等者合爲元祐黨籍文臣會任宰臣執政官二十七人司馬光文彥博呂公著呂大防劉摯范純仁韓忠彥曾布梁燾王巖叟蘇轍王存鄭雍傅堯俞趙瞻韓維孫固范百祿胡宗愈李清臣劉奉世范純禮安燾陸佃黃履張商英蔣之奇會任待制以上官四十九人蘇軾劉安世范祖禹朱光庭姚勔趙君錫馬默孔武仲孔文仲吳安持錢勰李之純孫覺鮮于侁趙彥若趙

齒王欽臣孫升李周王汾韓川顧臨賈易呂希純曾肇
王觀范純粹呂陶王古豐稷張舜民張問楊畏鄒浩陳
次升謝文瓘岑象求周鼎徐勣路昌衡董敦逸上官均
葉濤郭知章楊康國龔原朱紱葉祖洽朱師服餘官一
百七十七人秦觀黃庭堅晁補之張耒吳安詩歐陽棐
劉唐老王輦呂希哲杜純張保源孔平仲湯敏司馬康
宋保國黃隱畢仲游常安民汪衍余爽鄭俠常立程頤
唐義問余下李格非陳瓘任伯雨張庭堅馬涓孫謗陳
郭朱光裔蘇嘉龔夬王回呂希績吳儔歐陽中立尹林
葉伸李茂直吳處厚李積中商倚陳祐虞防李祉李深

李之儀范正平曹蓋楊琳蘇昞葛茂宗劉謂柴袞洪羽
趙天佑李新衡鈞兗公適洪伯藥周誼孫琮范采中鄧
考甫王察趙嶠封覺民胡端脩李傑李賁趙令畸郭執
中石芳金極高公應安信之張集黃策吳安遜周永微
高漸張夙鮮于綽呂諒卿王貫朱紘吳朋梁安國王古
蘇迨檀固何大受王箴鹿敏求江公望曾紓高士育鄧
忠臣种師極韓治都脫秦希甫錢景祥周綺何大正呂
彥祖梁寬沈千曹興宗羅鼎臣劉勃王拯黃安期陳師
錫于肇黃遷莫俠許堯輔楊朏胡良梅君俞寇宗顏張
居李脩逢純熙高遵恪黃才曹盥侯顯道周遵道林膚

葛輝宋壽岳王公彥王交張溥許安脩劉吉甫胡潛董
祥楊懷寶倪直孺蔣津王守鄧元中梁俊民王陽張裕
陸表民葉世英謝潛陳唐劉經國扈充張恕陳弁洪芻
周諤蕭利趙鉞滕友江洵方适許端卿李昭玘向紃陳
察鍾正甫高茂華楊彥璋廖正一李夷行彭醇梁士能
武臣二十五人張巽李備王獻可胡田馬諗王履趙希
夷任濬郭子旂錢盛趙希德王長民李冰王庭臣吉師
雄李愚吳休復崔昌符潘滋高士權李嘉亮李琰劉延
肇姚雄李基內臣二十八人梁惟簡陳行張士良梁知
新李倬譚戾竇鉞趙約黃卿從馮說曾燾蘇舜民楊偁

梁弼陳恂張茂則張琳裴彥臣李備閻守蕙王綏李穆
蔡克明王化基王道鄧世昌鄭居簡張怙爲臣不忠曾
任宰臣二人王珪章惇通三百九人刻石朝堂餘竝出
籍自今母得復彈奏秋七月辛卯復行方田法是月魏
漢津鑄景鐘成八月丙午許將罷知河南府九月乙亥
以趙挺之爲門下侍郎吳居厚爲中書侍郎張康國爲
尚書左丞鄧洵武爲尚書右丞壬辰詔諸路州學別置
齋舍養材武之士冬十月戊午夏人入涇原圍平夏城
寇鎮戎軍已巳立九廟復翼祖宣祖十一月甲戌幸太
學官論定之士十六人遂幸辟雍司業以下賜資有差

丁亥詔取士竝繇學校罷發解及省試法丙申祀昊天
上帝于圜丘赦天下十二月戊午同知樞密院事安惇
卒是歲諸路蝗京畿大雨水官墜壓溺者黎洞蠻楊威
免等內附占城來貢

四年春正月丙戌築溪哥城丙申蔡卞罷知河南府丁
酉以內侍童貫爲熙河蘭湟秦鳳路經略安撫制置使
二月乙巳築御謀城甲寅以張康國知樞密院事劉達
同知樞密院事何執中爲尚書左丞閏月壬申令州縣
倣尚書六曹分六案甲申鑄當二夾錫鐵錢三月甲辰
以趙挺之爲尚書右僕射兼中書侍郎戊午復銀州是

月夏人與羌酋合兵圍宣威城殺知鄯州高永年王厚
坐貶夏四月辛未遼遣使爲夏人請舊疆及緩師是月
夏人屢入寇五月戊申除黨人父兄子弟之禁六月趙
挺之罷爲中太乙宮使賜信州道士張繼元號虛靖先
生秋七月辛丑置四輔郡甲寅詔奪元祐輔臣墳寺丁
巳還上書流人八月奠九鼎于九成宮親行酌獻禮九
月朔御大慶殿受賀用新樂詔曰禮樂之興百年於此
然去聖愈遠遺聲弗存迺者得隱逸之士於草茅之間
獲英華之器於受命之邦適時之宜以身爲度鑄鼎以
定律因律以制器按協於庭八音克諧昔堯有大章舜

有大韶三代之王亦各異名今追于載而成一代之制
宜賜新樂之名曰大晟朕將薦郊廟享鬼神和萬邦與
天下共之其舊樂勿用己亥赦天下乙巳詔元祐人貶
謫者徙近地惟不得至畿輔是歲自七月雨至于十月
蘇湖秀三州水振之知桂州王祖道奏黎洞王江蠻內
附占城來貢

五年春正月戊戌彗出西方長竟天甲辰以吳居厚爲
門下侍郎劉達爲中書侍郎乙巳以星變詔求直言毀
元祐黨人碑復謫者仕籍丁未以太白晝見赦天下除
黨人一切之禁二月丙寅蔡京罷爲中太乙宮使以趙

挺之爲特進尚書右僕射兼中書侍郎三月丙申罷求
直言丙辰蔡王似卒夏四月丁丑停免兩浙水災州郡
夏稅五月丁未班紀元曆乙卯罷辟舉復元豐選法秋
七月庚寅朔日當食不虧壬寅詔改明年元九月辛丑
河南府嘉禾與芝草同本生冬十一月辛卯陳王佖卒
十二月戊午朔日當食不虧羣臣稱賀己未劉逵罷知
亳州是歲黎洞蠻韋晏閼等內附蒲甘來貢

大觀元年春正月戊子朔改元赦天下甲午以蔡京爲
尚左僕射兼門下侍郎庚子置議禮局於尚書省壬
寅吳居厚罷爲太乙宮使戊申進封弟侯魏王偲鄧王

三月丁酉趙挺之罷爲佑神觀使以何執中爲門下侍郎鄧洵武爲中書侍郎梁子美爲尚書左丞朱譯爲尚書右丞甲辰立八行取士科夏五月庚寅鄧洵武罷知隨州癸卯詔諸路監司勿任元祐學術及異意者六月己未以梁子美爲中書侍郎甲子以黎人地爲庭宇二州乙亥尚書右丞朱譯卒秋八月庚申以徐處仁爲尚書右丞林據同知樞密院事九月辛亥大饗明堂赦天下侍御史沈琦御史蕭服坐平反章縱獄貶縱竄海島冬閏十月丙戌以林據爲尚書左丞鄭居中同知樞密院事乙未詔曰國家休養生民垂百五十年生齒日繁

而戶部民籍曾不加益州縣於進丁入老收落失實以故課役不均皆守令弛職可申嚴考課法立鎮州爲靖海軍十一月壬子朔日有食之蔡京以不及所當食分率羣臣稱賀戊寅廣西經略使王祖道殺南丹州刺史莫公俊以其地爲觀州尚書右丞徐處仁母喪去位十二月庚寅以開邊功進蔡州刺史王祖道官是歲甘露降九成宮帝鼐內汀懷二州慶雲見乾寧軍同州黃河清秦鳳旱京東水河洛溢振之涪州夷駱世華等內附以其地爲珍承州于闐夏國來貢

二年春正月壬子朔受八寶于大慶殿赦天下已未進

蔡京童貫官庚申進封弟僕燕王憲越王子桓定王楷
樞杞栩棫構並進封有差戊寅河東北盜起三月庚申
班金鑑靈寶道場儀範于天下夏四月甲辰復洮州五
月庚戌朔日有食之辛亥以復洮州功賜蔡京玉帶加
童貫官秋八月丙申梁子美罷知鄆州九月辛亥以林
摠爲中書侍郎余深爲尚書左丞癸酉皇后王氏崩冬
十三月壬寅葬靖和王皇后于永裕陵是歲同州黃河
清邢州河溢壞民舍振之子闢夏國來責知桂州張莊
奏安化諸州蠻內附詔以莊爲黔南安撫使是時渝州
蠻亦內附以其地爲溱州

三年春二月丙子朔播州楊文貴納土以其地置遵義軍三月壬申知樞密院事張康國卒夏四月戊寅林攄罷知滁州癸巳以鄭居中知樞密院事管師仁同知樞密院事癸卯以余深爲中書侍郎薛昂爲尚書左丞劉正夫爲尚書右丞五月乙巳朔孟翊獻所畫卦象謂宋將中微宜更年號改官名變庶事以厭之帝不樂詔竄遠方六月甲戌朔管師仁罷爲佑神觀使丁丑蔡京罷爲中太乙宮使辛巳以何執中爲特進尚書左僕射兼門下侍郎瀘州夷內附以其地爲純磁州冬十二月己亥罷鑄錢新法是歲閩瀝占城夏國來貢江淮荆浙福

建旱秦鳳階成饑振之陝州同州黃河清原師甘露再降自是歲有甘露之瑞語在五行志

四年春二月己丑以余深爲門下侍郎張商英爲中書侍郎侯蒙同知樞密院事夏五月丁未彗出奎婁甲寅立詞學兼茂科丙辰以星變避殿減膳求直言戊午赦天下癸亥治廣西妄言拓地罪追貶王祖道爲昭信軍節度副使放張莊于永州甲子貶蔡京官丙寅余深罷知青州六月乙亥以張商英爲尚書右僕射兼中書侍郎丙申薛昂罷知江寧府秋八月乙亥以劉正夫爲中書侍郎侯蒙爲尚書左丞鄧洵仁爲尚書右丞庚辰以

吳居厚爲門下侍郎閏月辛酉以張閣知杭州兼領花
石綱九月丙寅朔日有食之冬十月丁酉立貴妃鄭氏
爲皇后鄭居中罷爲中太乙宮使戊戌以吳居厚知樞
密院事十一月丁卯祀昊天上帝于圜丘赦天下改明
年元是歲夔州江水溢海水清夏國來貢南丹州蠻莫
公晟內附

政和元年春正月壬辰詔百官厲名節三月癸酉以王
襄同知樞密院事夏五月戊辰改當十錢爲當三秋八
月丁巳張商英罷知河南府九月戊寅王襄罷知亳州
是月鄭允中童貫使遼以李良嗣來良嗣獻取燕之策

賜姓趙冬十二月己酉詔臺諫以直道覈是非母憚大吏母比近習是歲虔州芝草生蔡州瑞麥連野河南府嘉禾生野蠶成繭交趾夏國來貢

二年春二月戊子朔蔡京落致仕三日一至都堂議事六月己丑以余深爲門下侍郎秋七月丙子置禮制局九月壬午改太尉以冠武階癸未正三公三孤官改侍中爲左輔中書令爲右弼左右僕射爲太宰少宰罷尚書令冬十月乙巳得玉圭於民間十一月戊寅日南至受元圭于大慶殿赦天下辛巳太師蔡京進封魯國公何執中爲少

傳太宰執政皆進秩十二月甲申行給地牧馬法是歲
蜀夷內附置亨祺州高麗來貢

三年春正月癸酉追封王安石及子雱配饗孔廟丁丑
吳居厚罷知洪州以鄭居中知樞密院事二月辛卯崇
恩太后劉氏暴崩甲午以遼女真相持詔飭邊防三月
壬子朔日有食之夏四月戊子作保和殿乙巳作玉清
和陽宮癸巳鄧洵仁罷知亳州己酉以薛昂爲尚書右
丞庚戌班五禮新儀五月丙午葬昭懷劉皇后于永泰
陵己酉頒新燕樂秋八月丙子以何執中爲少師九月
戊戌貴妃劉氏薨追冊爲皇后冬十一月癸未祀昊天

上帝于圜丘大赦是歲賜方士王老志號洞微先生詔
天下訪求道教仙經江東旱溫封磁三州火

四年春正月戊寅置道階二十六等二月癸酉子定王
桓冠夏五月丙戌祭地于方澤以太祖配赦天下六月
壬申以廣西溪洞地置隆兌二州秋八月新作延福宮
成冬十二月詔廣南市舶司歲貢真珠犀角象齒是冬
都水使者孟昌齡獻議導河大伾置永遠浮橋從之
五年春正月壬申朔女真完顏阿骨打稱帝國號金庚
辰瀘南晏州夷反詔轉運使趙適等討平之二月甲寅
冊定王桓爲皇太子赦天下庚午以童貫領六路邊事

夏四月甲辰作祫真宮秋七月戊辰朔日有食之丁丑
新作明堂詔曰宗祀明堂以配上帝寓於寢殿禮蓋云
闕崇寧之初嘗詔建立去古既遠歷代之模無足循襲
朕刺經稽古度以九筵分其五室通以八方上圓下方
參合先王之制相方視址于寢之南備工鳩材自我作
古以稱朕昭事上帝率見昭考之心庚子御製大伾三
山橋銘冬十一月庚寅高麗遣子弟入學是歲賜方士
王仔昔號沖隱處士尋進通妙先生平江府常湖秀州
水

六年春正月戊子以瀘南獻捷轉宰執官以童貫宣撫

陝西河北閏月丁未置道學夏四月乙丑大內作上清
寶鑑宮成會道士辛未太宰何執中致仕庚寅詔蔡京
三日一朝正公相位總治三省事五月庚子以鄭居中
爲少保太宰兼門下侍郎劉正夫爲特進少宰兼中書
侍郎壬寅以鄧洵武知樞密院事六月癸未冊朱氏爲
皇太子妃秋八月壬午詔天下監司郡守搜訪巖谷之
士雖恢詭譎怪自晦者悉以名聞九月辛卯朔詣玉清
和陽宮上玉皇上帝徽號冊寶內申赦天下令洞天福
地修宮觀塑造聖像冬十一月己亥祀昊天上帝于圜
丘赦天下庚子以白時中爲尚書右丞戊申以侯蒙爲

中書侍郎薛昂爲尚書左丞十二月戊寅以熙河進築
功成進宰執官乙酉少宰劉正夫致仕是歲茂州夷內
附置壽寧延寧軍賜方士林靈素號通真達靈先生冀
州三山黃河清高麗占城大食真臘大理夏國來貢

七年春二月甲子會道士二千餘人于上清寶籙宮詔
林靈素諭以帝君降臨事夏四月庚申帝諷道籙院曰
朕乃上帝元子爲太霄帝君憫中華被金狄之教遂懇
上帝願爲人主令天下歸於正道卿等可上章冊朕爲
教主道君皇帝五月己丑詣玉清和陽宮上皇地祇微
號冊寶辛丑祭地于方澤赦天下癸卯改玉清和陽宮

爲玉清神霄宮秋八月癸亥太宰鄭居中母喪去位九
月辛卯大饗明堂葬祀五帝赦天下丁酉西蕃王子益
麻党征降見于紫宸殿冬十月乙卯朔初御明堂班朔
布政戊寅侯蒙罷知亳州十一月庚寅命蔡京五日一
赴都堂治事辛卯太宰鄭居中起復以余深爲特進少
罕兼中書侍郎白時中爲中書侍郎十二月丁巳以薛
昂爲門下侍郎戊辰詔天神降于坤寧殿刻石紀之庚
午以童貫頃樞密院事命戶部侍郎孟揆作萬歲山事
具地理志是歲三山河水清熙河環慶涇原地震于闐
來貢

重和元年春正月甲申朔受定命寶于大慶殿己丑赦
天下庚戌以王黼爲尚書左丞二月庚子遣武義大夫
馬政浮海使金約夾攻遼夏五月壬午朔日有食之丁
亥以林靈素爲通真達靈元妙先生張虛白爲通元沖
妙先生秋七月壬午以西師有功加蔡京恩鄭居中爲
少傅余深爲少保鄧洵武以下並進秩八月甲寅以童
貫爲太保辛酉詔班御註道德經九月辛巳大饗明堂
丙戌詔太學辟雍各置內經道德經莊子列子博士庚
寅薛昂罷爲佑神觀使以白時中爲門下侍郎王黼爲
中書侍郎馮熙載爲尚書左丞范致虛爲尚書右丞辛

升太宰鄭居中罷起復閏月丁卯子楷進封鄆王丙子
立恭帝後監周陵廟世世爲國三恪是月集古今道教
事爲紀志賜名道史作神霄九鼎冬十月甲辰置道官
二十六等道職八等十一月己酉朔改元大赦天下是
歲掖庭大火江淮荆浙梓州水振之于闐高麗來貢

宣和元年春正月壬子進封子樞肅王杞景王乙卯詔
佛改號大覺金僧行爲德士寺爲宮院爲觀丁巳金人
使李善慶來遣趙有開報聘不至而復戊午以余深爲
太宰兼門下侍郎王黼爲特進少宰兼中書侍郎乙亥
躬耕籍田二月庚辰改元易宣和殿爲保和殿戊戌以

鄧洵武爲少保三月庚戌蔡京等進安州所得商六船
已未以馮熙載爲中書侍郎范致虛爲尚書左丞張邦
昌爲尚書右丞童貫遣知熙州劉法攻統安城夏人伏
兵擊之法敗殿甲戌皇后親鑿夏四月丙子朔日有食
之童貫遣兵取朔方敗績劉法死之貫以捷聞論功行
賞五月丁未詔德士並許入道學依道士法丙辰童貫
奏言敗夏人于震武壬申班御製九星二十八宿朝元
冠服圖是月大水犯都城起居郎李綱奏求直言以答
天戒坐貶六月甲申封莊周爲微妙元通真君列禦寇
爲致虛觀妙真君仍行冊命配享混元皇帝己亥夏國

遣使納款詔六路罷兵秋七月甲寅以童貫爲太傅八
月丁酉尚書左丞范致虛母喪去位九月辛酉大饗明
堂冬十月甲戌以紹述熙豐政事書布告天下十一月
乙卯祀昊天上帝于圜丘赦天下戊辰以張邦昌爲尚
書左丞王安中爲尚書右丞時朱勔以花石綱媚上東
南騷動太學生鄧肅進詩諷諫詔放歸田里十二月丙
申正字曹輔上書諫微行編管郴州是冬開修兔源河
并直河畢工詔獎諭是歲召楊時爲祕書郎京西饑淮
東旱東南諸路水嵐州黃河清

二年春正月甲子罷道學夏五月丁巳祭地于方澤布

衣朱夢說上書諭宦寺編管池州六月戊寅詔蔡京致仕丁亥復寺院額秋九月乙巳復德士爲僧辛亥大饗明堂丙辰復遣馬政使金議攻遼癸亥以余深爲少傳冬十月戊辰朔日有食之建德軍妖賊方臘反命內侍譚楨討之語在童貫傳十一月己亥余深罷知福州庚戌以王黼爲少保太宰兼門下侍郎十二月丁亥改譚楨爲兩浙制置使以童貫爲江淮荆浙宣撫使討方臘是月方臘陷建德歙州東南將郭師中戰死又陷杭州廉訪使者趙約詆賊死是歲淮南旱直臘夏國來貢三年春正月戊午進封子濟王模樂安郡王辛酉罷

蘇杭州造作局及御前綱運乙丑罷木石彩色等場務
是月方臘陷婺州又陷衢州守臣彭汝方死之二月庚
午罷方田癸巳赦天下是月方臘陷處州淮南盜宋江
等犯諸郡命知海州張叔夜招降之夏四月庚寅忠州
防禦使辛興宗擒方臘于清溪癸巳汝州牛生麒麟五月
戊戌以鄭居中領樞密院事甲辰貴妃劉氏薨追冊
爲皇后丙午金人再遣曷魯等來癸亥御史中丞陳過
庭張汝霖以乞罷御前使喚及歲進花果並貶竄閩月
復應奉司命宰相王黼及內侍大尉梁師成領之秋七
月丁亥廢新置純磁等十二州是月洛陽京畿訛言有

黑眚如人或如犬夜出掠小兒食之二歲乃息八月乙巳以童貫爲太師九月丙寅以王黼爲少傅鄭居中爲少師辛未大饗明堂冬十月甲寅童貫復領陝西兩河宣撫十一月丁丑馮熙載罷知亳州以張邦昌爲中書侍郎王安中爲尚書左丞李邦彥爲尚書右丞是月河決清河埽十二月辛卯朔日中有黑子自崇寧三年至此凡五見壬子進封子構康王模祁王是歲諸路蝗水壞天成聖功橋詔宦者李彥括民田于東南西路

四年春正月丁卯以蔡攸爲少保癸酉金人破遼中京遼主出奔三月丙子金人來約夾攻遼命童貫屯兵于

邊以應之夏四月丙午詔錄三司書置宣和殿及太清
樓祕閣五月乙亥以蔡攸爲河北河東宣撫副使六月
己丑帝聞攻遼兵敗詔班師壬寅以王黼爲少師秋七
月壬午詔童貫蔡攸再舉伐遼以河陽三城節度使劉
延慶爲都統制九月戊午朝散郎宋昭上書諫北伐除
名廣南編管己未金人來議師期辛酉大饗明堂甲戌
遣趙良嗣報聘丁巳卯遼涿州留守郭藥師以涿易
二州來降冬十月改燕京爲燕山府以蔡攸爲少傅判
燕山府郭藥師等襲燕屢敗績劉延慶燒營夜遁軍潰
遼將蕭幹追至涿水乃還十一月庚午祀昊天上帝于

園丘赦天下戊寅金人來許山前六州十二月戊子復遣趙良嗣報聘于金求營平灤三州辛卯金人入燕遼蕭后出奔壬辰金人來獻捷壬寅子植進封莘王

五年春正月戊午金人遣李靖來議所許六州代租錢已未趙良嗣復如金求西涼等州辛酉王安中罷知燕山府郭藥師同知府事二月乙酉朔以李邦彥爲尚書左丞趙野爲尚書右丞丙戌金人以議未合斷橋梁焚次舍丁酉進封子朴華原郡王棣高平郡王三月乙卯金人再遣寧术割等來時宋許納遼人舊歲幣四十萬仍歲加燕京代租錢一百萬緡金但許歸燕京及六州

己未遣盧益報聘于金皆如其約夏四月癸巳金人遣
楊璞以誓書及燕京涿易檀順景薊州來歸五月以收
復燕雲賜宰臣王黼玉帶復以王黼爲太傅總治三省
事鄭居中爲太保蔡攸爲少師童貫封徐豫國公癸酉
祭地于方澤六月丙戌知平州張覺叛金以州來附丁
未知樞密院事鄭居中致仕翌日卒辛亥以蔡攸領樞
密院事秋七月戊午以梁師成爲少保己未太師童貫
致仕起復譚稹爲河北等路宣撫使庚午禁元祐學術
八月辛巳朔日有食之雲陰不見戊申金主阿骨打卒
弟吳乞買立九月辛酉大饗明堂冬十月乙酉雨木冰

十一月乙卯以鄭紳爲太師丙寅諸路漕臣坐闕上供
貶秩者二十二人丁卯華原郡王朴卒是月金人取平
州張覺走燕山金人索之急命王安中縊殺函首送之
十二月乙巳金人遣使來賀正旦戊申子棟進封徐王
是歲秦鳳旱河南京東淮南饑振之

六年春正月戊寅遣連南夫弔祭金國二月丁亥子楞
進封河間郡王己亥躬耕籍田三月己酉朔金人來索
趙良嗣所許糧二十萬石不與閏月辛巳皇后親蠶夏
四月丁巳尚書左丞李邦彥遭喪起復六月壬子詔以
收復燕雲以來京東兩河之民困於調度令諸路竝納

免夫錢秋七月甲辰置璣衡所八月乙卯譚稹罷宣撫
使以童貫領樞密院代之壬戌以復疏雲散天下九月
乙亥以白時中爲特進太宰兼門下侍郎李邦彥爲少
宰兼中書侍郎辛巳大饗明堂丁亥以趙野爲尚書左
丞宇文粹中爲尚書右丞蔡懋同知樞密院事冬十月
庚午詔有收藏習用蘇黃之文者並令焚毀十一月丙
子太宰王黼致仕是月以帑藏空竭罷應奉司令尚書
省置講議財利司十二月癸亥蔡京落致仕領三省事
是歲河北山東盜起命內侍梁方平討之京師河東陝
西地大震兩河京東西浙西水環慶邠寧涇原民流徙

宋史卷一百一十一
令所在振恤夏國高麗子闕羅殿來貢

七年春二月己酉兩木冰三月丙戌子模進封建安郡王夏四月庚申蔡京勒致仕戊辰詔復元豐官制三公不領三省事六月辛丑詔宗室復著姓丙午封童貫爲廣陽郡王秋七月庚午詔士庶毋以天王君聖爲名字及以壬戌日輔臣焚香甲戌子擇進封沂王是月熙河河東路地震九月辛巳大饗明堂壬辰金人以擒遼主延禧來告慶遼於是亡是月有狐升御榻而坐冬十一月丙戌祀昊天上帝于圜丘赦天下庚寅以金將斡离不粘罕分道入寇召种師道爲河東河北路制置使十

二月乙巳童貫自太原逃歸己酉金兵至燕山郭藥師
降圍太原府太常少卿傅察奉使不屈死之北邊諸郡
皆陷丙辰金兵犯中山府罷諸路花石綱延福宮西城
租課及內外製造局戊午以皇太子桓爲開封牧己未
下詔罪已令中外直言極諫郡邑率師勤王募草澤異
才能出奇計及使疆外者_{皆能}道官罷大晟府行幸局庚
申詔內禪以吳敏爲門下侍郎明日皇太子卽位尊帝
爲教主道君太上皇帝居龍德宮尊皇后爲道君太上
皇后帝在位二十六年靖康二年二月金將脅帝與欽
宗北去紹興五年四月崩于五國城年五十四七年正

月凶問至遙上尊謚曰聖文仁德顯孝皇帝廟號徽宗
十二年八月梓宮還臨安十三年加今謚

論曰古之帝王卑宮菲食不敢縱於民上者且故自苦其身以天下爲桎梏哉蓋昭德塞違爲久安長治計也何宋徽宗不鑒辟王亡轍狎伎諛而崇詭誕飾遊觀而窮侈靡君臣逸豫自謂樂且未央豈虞身陷沙漠而荆棘生殿廷也且帝嗣立何如時耶熙豐紛更之弊已深紹聖因仍之蠹未飭警猶積疴在躬而嗜欲不節必無幸矣禁眚惕孤亡徵先見天厭昏德不亦章章乎

宋史新編卷八

本紀八

明南京戶部主事莆田柯維騏著

欽宗

欽宗恭文順德仁孝皇帝諱桓徽宗長子也母曰恭顯皇后王氏元符三年四月十三日生帝于宮中初名亶封韓國公明年進開府儀同三司封京兆郡王崇寧元年更名烜又改今名大觀二年進封定王政和三年加太保五年二月立爲皇太子宣和七年十二月戊午除開封牧庚申徽宗內禪辛酉帝卽位壬戌大赦立朱氏爲皇后以耿南仲簽書樞密院事甲子金將斡离不陷

信德府粘罕圍太原詔京東淮西兩浙募兵入衛太學生陳東上書數蔡京童貫王黼梁師成李彥朱勔罪謂之六賊請誅之丙寅上太上皇帝及太上皇后尊號

靖康元年春正月丁卯朔受羣臣朝退詣龍德宮賀道君皇帝詔中外臣庶實封言闕政戊辰金人破濬州威武軍節度使梁方平帥潰兩河副制置使何灌退保滑州己巳灌奔還金人濟河詔親征道君皇帝東幸以蔡攸爲行宮使宇文粹中副之詔自今除授黜陟及恩數等事兼參酌祖宗舊制罷內外官司局所一百五處以吳敏知樞密院事李棁同知樞密院事貶王黼安置永

州賜李彥死並籍其家放朱勔歸田里黼至雍丘盜殺之庚午道君皇帝如亳州百官多潛遁宰相欲奉帝出襄鄧留守李綱諫止之以綱爲尚書右丞辛未以李綱爲親征行營使太宰白時中罷以李邦彥爲太宰兼門下侍郎張邦昌爲少宰兼中書侍郎趙野爲門下侍郎王孝迪爲中書侍郎蔡懋爲尚書左丞癸酉金人犯京師軍于城西北是夜金人攻宣澤門李綱禦之斬獲百餘人甲戌金遣使來議和以唐恪耿南仲竝同知樞密院事乙亥金人攻景陽等門李綱督戰竟日斬首數千級何灌戰死李棁使金軍是日與金使來索金帛數千

萬且求割太原中山河間三鎮并宰相親王爲質乃退
師丙子括借金銀籍倡優家財庚辰命張邦昌副康王
構使金軍詔稱金國加大字辛巳道君皇帝如鎮江以
路允迪簽書樞密院事壬午封子諶爲永寧郡王丁亥
兩河制置使种師道督涇原秦鳳兵入援以師道同知
樞密院事統四方勤王兵及前後軍乙未貶梁師成爲
昭化軍節度副使賜死於途二月丁酉朔命都總制姚
平仲將兵夜襲金軍不克而奔戊戌罷李綱以謝金人
金人復來議和辛丑命宇文虛中等許割三鎮地太學
諸生陳東等及都民數萬人伏闕上書請復用李綱及

种師道乃復綱尚書右丞充京城防禦使語在綱傳壬寅除元祐黨籍學術之禁廢苑囿宮觀可以與民者金人復遣使來癸卯命肅王樞使金軍更康王歸以徐處仁爲中書侍郎宇文虛中簽書樞密院事蔡懋罷知大名府王孝迪罷提舉醴泉觀乙巳金人來告辭遂退師京師解嚴戊申赦天下詔自今遵用祖宗舊制凡蠹國害民事一切寢罷己酉罷宰執兼神霄玉清萬壽宮使爻殿中監符寶郎庚戌李邦彥罷爲中太乙宮使以張邦昌爲太宰兼門下侍郎吳敏爲少宰兼中書侍郎李納知樞密院事耿南仲爲尚書左丞李榦爲尚書右丞

辛亥字文粹中罷知江寧府癸丑种師道罷爲中太乙
宮使甲寅貶蔡京爲祕書監分司南京童貫爲左衛上
將軍池州居住蔡攸爲太中大夫提舉亳州明道宮先
是粘罕遣人來求賂大臣以勤王兵大集拘其使人且
結約余覩以圖之至是粘罕怒分兵趣京師乙卯陷隆
德府知府張確通判趙伯臻等死之辛酉梁方平坐棄
河津伏誅王孝迪罷爲醴泉觀使三月戊辰李梲罷爲
鴻慶宮使己巳張邦昌罷爲中太乙宮使以徐處仁爲
太宰兼門下侍郎唐恪爲中書侍郎何㮚爲尚書右丞
許翰同知樞密院事庚午宇文虛中罷知青州壬午詔

金人叛盟深入其元主和議李邦彥奉使許地李摶李
鄴鄭望之悉行罷黜又詔种師道姚古种師中往援三
鎮庚寅姚古復隆德府辛卯復威勝軍甲午籍朱勔家
丙申再貶蔡京爲崇信軍節度副使夏四月戊戌夏人
犯鎮威城攝知城事朱昭死之己亥迎太上皇帝入都
門壬寅朝于龍德宮癸卯立子諶爲皇太子以耿南仲
爲門下侍郎乙巳置春秋博士己酉以生日爲乾龍節
庚戌趙野罷知襄陽府癸丑貶童貫爲昭化軍節度副
使安置郴州詔開經筵令吏部稽考庶官凡由楊戩李
彥之公田王黼朱勔之應奉童貫西北之師孟昌齡河

防之役夔蜀湖南之開疆關陝河東之改幣及近習所
引獻頌可采特赴殿試之流所得爵賞悉奪之甲寅復
以种師道同知樞密院事充兩河宣撫使戊午進封弟
栻和王湊信王已未復以詩賦取士禁用老莊及王安
石字說壬戌追政和以來道官處士先生封贈奏補等
敕書乙丑再貶蔡攸節度副使安置朱勔于循州五月
丙寅朔朝于龍德宮戊辰以國子祭酒楊時言罷王安
石配享孔廟降從祀時隨罷丁丑河東制置使姚古將
兵至威勝聞粘罕將至衆驚潰河東大震制置副使种
師中與金人戰于榆次死之六月丙申朔詔諫官極論

賜失戊戌詔舉將才時太原圍急群臣欲割三鎮地李
綱沮之乃以李綱代种師道爲宣撫使援太原辛丑以
劉韞爲宣撫副使壬寅封弟樞安康郡王捷廣平郡王
詔今日政令惟遵奉上皇詔書脩復祖宗故事群臣庶
士亦當講孔孟之正道察王安石舊說之不當者羽翼
朕志以濟中興甲辰路允迪罷提舉醴泉觀壬戌彗出
紫微垣貳姚古爲節度副使安置廣州秋七月乙丑朔
除元符上書邪等之禁乙亥安置蔡京于儋州蔡攸雷
州童貫吉陽軍乙酉詔蔡京子孫二十三人已分竄遠
地遇赦不許量移是日京死于潭州丁亥令改脩宣仁

謗史辛卯誅董貫趙良嗣竝竊其子孫于海南八月丙
申復命种師道以宣撫使巡邊召李綱還丁未幹离不
犯真定己酉金人乘勝攻太原乙卯劉岑李若水分使
金軍議和戊午許翰罷知亳州己未徐處仁罷知東平
吳敏罷知揚州以唐恪爲少宰兼中書侍郎何㮚爲中
書侍郎陳過庭爲尚書右丞聶昌同知樞密院事李回
簽書樞密院事庚申遣王雲使金軍許以三鎮賦稅九
月丙寅金人犯太原安撫使張孝經副都總管王稟等
皆死之辛未貶吳敏安置涪州移蔡攸于萬安軍攸尋
與弟絳及朱勔皆賜死了丑以王富爲尚書左丞戊寅

李綱罷知揚州壬午梟童貫首于都市癸未賜布衣尹
焞爲和靖處士庚寅置四道都總管以趙野王襄張叔
夜胡直孺領之罷李綱提舉洞霄宮辛卯遣給事中黃
諤由海道使金議和隨罷西南勤王兵是月夏人陷西
安州冬十月癸巳朔貶李綱安置建昌軍丁酉金人陷
真定都鈴轄劉翊死之戊戌金人使楊天吉至汭來庚
子金人陷汾州知州張克戬兵馬都監賈亶死之又攻
平定軍辛丑下哀痛詔丙午議割三鎮召种師道還丁
未以馮澥知樞密院事乙卯雨木冰丙辰金人陷平陽
府又陷威勝隆德澤州辛酉同知樞密院种師道卒十

一月丙寅夏人陷懷德軍知軍事劉銓通判杜翊世死
之籍譚稹家戊辰馮澥罷爲太子賓客癸酉金人至河
外宣撫副使折彥質領師十三萬拒之甲戌師潰金人
濟河知河陽燕瑛西京留守王襄棄城遁乙亥命刑部
尚書王雲副康王使斡離不軍許割三鎮奉袞冕車輶
尊其主爲皇伯且上尊號十八字丙子金人渡河折彥
質兵盡潰提刑許高兵潰于洛口金人來言欲盡得河
北地京師戒嚴遣馮澥李若水使粘罕軍丁丑何㮚罷
爲醴泉觀使以陳過庭爲中書侍郎孫傅爲尚書右丞
命郭京領選六甲正兵所李回以萬騎防河衆潰而歸

是日塞京城門壬午命耿南仲使幹離不軍韓昌使粘
罕軍許畫河爲界康王至磁州磁人以王雲將挾帝入
金遂殺雲止王勿行王復還相州韓昌行全絳亦爲絳
人所殺南仲奔相州甲申以孫傅同知樞密院事曹輔
簽書樞密院事以范致虛爲陝西五路宣撫使令督勤
王兵入援乙酉幹離不軍至城下丁亥李回罷提舉萬
壽觀己丑南道總管張叔夜將兵勤王幹離不遣劉晏
來庚寅詔三省官名悉依元豐舊制以何處爲尚書左
郎閏月壬辰唐恪罷爲中太乙宮使以何處爲尚書左
僕射兼中書侍郎癸巳粘罕軍至城下甲午驛召李納

爲資政殿大學士領開封府金人陷懷州霍安國林淵
及其餘舊將張彭年等皆死之乙未金人入青城攻朝陽
門馮澥與金人蕭慶楊真誥來丁酉以馮澥爲尚書左
丞統制高師旦與金人戰于城下死之庚子以張叔夜
簽書樞密院事金人攻宣化門姚仲友禦之辛丑金人
攻南壁殺傷相當癸卯金人復攻南壁張叔夜范瓊分
兵襲之遙見金兵奔還自相蹈藉溺溼死者以千數甲
辰大雨雪遣間使召諸道兵勤王乙巳大寒士卒噤戰
不能執兵有僵仆者帝在禁中徒跣祈晴時勤王兵不
至城中惟衛士三萬然亦十失五六金人攻城急丙午

雨木冰已酉遣馮澥曹輔及宗室仲溫士誦使金軍請和命康王爲天下兵馬大元帥領兵入衛辛亥金人來議和要親王出盟壬子金人攻通津宣化門范瓊以千人出戰渡河冰裂沒者過半自是士氣益挫甲寅大風自北起俄大雨雪連日夜不止乙卯金人復使劉晏來趣親王等相出盟丙辰妖人郭京大啓宣化門出攻金人兵大敗京下城遁金兵登城衆皆披靡金人焚南薰諸門統制何慶言陳克禮中書舍人高振力戰與其家人皆被害姚仲友死于亂兵秦元領保甲斬關遁京城陷衛士入都亭驛執劉晏殺之戊午金人邀上皇出郊

帝曰上皇驚憂而疾朕當親往自乙卯雪不止是日
夜有白氣出太微彗星見庚申日赤如火無光辛酉帝
如青城十二月壬戌朔帝在青城癸亥帝至自青城甲
子大索金帛丙寅遣陳過庭劉韜使兩河割地是時以
金人議和詔止康王兵事具高宗紀

二年春正月辛卯朔命濟王栩景王杞出賀金軍金人
亦遣使入賀壬辰金人趣召康王還甲午詔兩河民開
門出降丁酉雨木冰庚子金人需索急何㮚李若水勸
帝再至金營以太子監國而行乙巳籍梁師成家丙午
劉韜自經于金軍帝爲金人所留太學生徐揆上書乞

守門講帝還闕金人取至軍中揆抗論爲所殺二月辛酉朔帝在青城丙寅金人輒南薰門路人心大恐已而金人令翰林承旨吳升吏部尚書莫儔入城推立異姓且要上皇如青城京城巡檢范瓊逼上皇與太后御犢車出宮金又以內侍鄧述所具諸王孫名檄開封尹徐秉哲盡取入軍中吏部侍郎李若水死之辛未金人逼上皇召皇后皇太子入青城癸未留守王時雍等署狀立張邦昌唐恪仰藥而死金人執孫傅張叔夜及御史中丞秦檜乙酉金人以括金未足殺尚書梅執禮侍郎陳知質程振給事中安扶三月辛卯朔帝在青城丁酉

金人立張邦昌爲楚帝閣門宣贊舍人吳華率衆討邦
昌死之丁巳金帥斡离不脅上皇及太后與親王皇孫
駙馬公主妃嬪由滑州北去夏四月庚申朔大風吹石
折木金帥粘罕以帝及皇后皇太子妃嬪宗室由鄭州
北去凡法駕鹵簿禮器樂器祭器八寶九鼎圭璧渾天
儀銅人刻漏古器太清樓祕閣三館書天下州府圖及
內侍技藝工匠優府庫蓄積爲之一空康王卽位遙
上帝尊號曰孝慈淵聖皇帝紹興三十一年崩于五國
城年六十二訃聞上尊謚廟號欽宗

論曰靖康之禍豈忍言哉始由蔡京王黼童貫輩之啓

黨終由唐恪李邦彥耿南仲輩之請和自古未有姦佞
盈朝而不致亂者亦未有闕冗在位而能濟事者要之
臣主俱僻宣政之亂勢已成惜使欽宗與諸臣有剛斷
之才安施乎抑春秋之法國君死社稷正也避難而圖
興復義猶未絕也帝父子竝爲囚虜何以逭斯責哉

宋史新編卷八